

220.133

35

部=14

也  
23.77

35

<p>卷十一 軍政志 掘港營圖 海防圖</p>	<p>卷十一 禮典志 開讀 宣講 迎春 新讀 宣講 入春 耕藉 新讀 宣講 入春 祈禱 祈禱 祈禱 祈禱 羣祀 歲時 壇祭</p>	<p>卷十 學校志 崇祀 禮儀 器數 義學 附並圖 書籍 書院 學額制 崇祀 禮儀 器數</p>	<p>卷九</p>
-------------------------------------	---	--	-----------

如臯縣志卷九

學校

學制 崇祀 書籍 書院

禮儀 器數 學額

社學 義學 附並圖

學額

學額

學田

學田

贊治化而維風教者人材也養之有其地董之有其人  
建學立官陶成者至矣況自安定以來明體適用臯固  
源遠流長者哉志學校

學制

南唐保大十年始建學於縣治之東北隅即今中禪寺地  
其規制姓氏不詳

宋大中祥符八年縣令曾易占建大成殿教堂

紹興初遷學於縣治之西南隅

淳熙二年縣令趙善權修元季燬於兵今胡安

節學

如臯縣志

卷九

學

之書址

明洪武三年知縣謝得民創建明倫堂東西二齋

十一年知縣劉國衡增修

十五年知縣周公鼎重建

宣德八年典史蔡寧修大成殿

正統七年知縣曹立增建櫺星門兩廡講堂齋舍厨庫會

饌堂觀德亭

侍講周敘記略如臯揚之泰州屬邑昔賢胡安定先生

之鄉也地僻俗淳士生其間說禮義敦詩書舊矣儒學

在邑治西南故址迫隘環學室廬歲久傾敝僅庇風雨

正統丁巳臨清曹侯立周覽學宮徘徊增慨率僚友捐

俸倡修之首門無次講堂次齋舍厨庫以及會饌之室  
觀德之亭嚴嚴翼翼各以序焉有未備者府判靜海王  
公益偕同寅復募民助充之惟大成殿則前監察御史  
崇陽蔡寧左遷爲典史所修也殿之西南隅有安定祠  
選胡氏後人充弟子員奉祀事監察御史歐陽彭公最  
命曹侯所建也始於正統辛酉六月訖於癸亥十月葺  
之非一人而曹侯之功居多焉竊嘗求之孔子之教曰  
文行忠信曰明德新民安定之教則有體有用有文皐  
士當熙洽之時有聖賢祠廟爲之瞻依尚益尊彝教以  
求深造乎道無負國家育才致用之意不其躋與

成化五年知縣王倫修大成殿建明倫堂葺兩星門

如臯縣志

卷九

學校

二

齋立科目題名碑

侍讀彭華科目題名記畧吾友王克彝爲泰州如臯令  
期年蠹剔害弛廢舉頽興尤悉心學校作明倫堂新大  
成殿葺兩廡若櫺星門若生徒齋舍巍然炳然士知所  
勸而民不告勞監察御史天台陳君至周視之喜克彝  
能舉職也曰盍伐石題鄉邑古今賢達人姓名以示激  
勸乎克彝曰然乃徵予記之泰古吳陵郡自昔有聞人  
胡安定瑗王龍圖覲實天下之望也安定教授蘇湖嚴  
條約以身先之爲文章皆傳經義敦尙行實後爲太學  
四方歸之庠舍不能容去而爲名臣者不可一二計龍  
圖立朝侃侃劾奏蔡童輩偉然有大節其爲潤州以歲

早蠲租雖忤使者不恤知蘇州誅奸吏有吏行冰上人  
在鏡中之謠在都府疏鑿舊渠以便民所至有惠愛夫  
胡之善教王之善政在天下皆可以爲師法而爲邑令  
佐於斯爲學師於斯者顧弗感發而興起乎宦遊於斯  
者尚有所感發而生長於其鄉者顧弗景仰先哲爲之  
惕然動心志乎夫觀其名慕其賢使人有所感動而無  
待乎號令刑法亦可謂善政善教已陳君名選字士賢  
克彝名倫克彝字也

七年知縣蔡彝教諭周鼎修

十四年知縣向翀復修大成殿兩廡重門明倫堂進德志  
道一齋易木主以像重製祭器

如臯縣志

卷九

學校

三

禮部尚書周洪謨記畧通江向九霄宰臯之又四年撤  
大成殿而新之肖聖賢像修兩廡構重門以及明倫堂  
進德志道二齋亦皆繕治加於舊規神庖神庫籩豆簋  
簋諸禮器率重製如式又市民地以拓學門之路門之  
外左右各峙桓表又建胡安定祠於學宮之西凡諸費  
不以煩民經始於成化丙申春而落成於戊戌秋嗚呼  
興學校以敦教化道之所由明也天下郡縣皆樹學宮  
置學官使士子卽遺經以求道而又崇孔子廟貌使有  
所瞻仰矜式凡遊學者日絃誦於宮牆之下如當時孔  
門弟子從遊乎洙泗之間亦何幸哉然必潛心經學以  
窮道蘊退而反求諸身以仁其親以敬其長言而道焉

則言以信行而道焉則行以謹道積厥躬達之於用斯學爲實學才爲真才上不負朝廷教養之恩次不負有司勸相之意矣九霄講道有獲而以之施於有政者如此可不謂豈弟君子遐不作人者乎時贊其事者縣丞陳箴主簿馬寧而董其役者耆民張文綱也

副使高宗本記畧成化戊戌之秋畧如臯儒學餘杭陸先生以書告予曰如臯舊學草創於立縣之初在縣治東北至宋大中祥符八年太常丞曾易占知縣事始建大成殿教堂紹興初復移建於縣治之西南元末兵毀國朝洪武庚戌詔天下郡縣皆立學知縣謝得民乃建明倫堂東西二齋爲講肄之所後知縣劉國衡馬公鼎

皆相繼增修至正統間知縣曹立而後大備歲日滋久震風凌雨不無頽圯成化乙未冬向侯翀撤大成殿而易以巨材肖聖賢像籩豆罍爵諸祭器之缺失者皆更造之櫺星門舊以木爲之不久朽壞則易以瓦甃而保其堅久戟門常患其卑隘不稱則廣拓其址而致其崇高又設致齋所於戟門之東以備祭祀之齋宿立先賢祠於戟門之西以爲後學之瞻仰神厨臨巷卑陋不潔則移之與神庫相麗以便祭祀之烹宰學門東向淺迫無規則改爲南向與櫺星門並峙而稍東號房不足又蓋造十餘間於明倫堂之西以充學者之肄業路道狹曲則又買民間隙地而闢之凡此興作皆向侯以均徭

餘積經營於其始其一應鳩工庀材之費則皆隨時區畫初未嘗勞民力傷民財而求其速成也夫學校爲毓材之地人材爲致治之本國家垂統百餘年而雍熙太和之治足以比隆唐虞三代者以明明在上穆穆布列者之得其人也何者而非學校之所造就哉蓋毓材於學校所以養其德明其道修其文舉而用之推而行之可以齊家可以治國可以平天下此有志於爲天下國家者未有不以學校爲事也余旣聞向侯之重學校而喜其得爲政之先務又見陸先生之重向侯而喜其識爲治之大體故爲記之如此

嘉靖四年知縣梁喬升修

如臯縣志

卷九

學校

五

十九年巡鹽御史吳悌焦璉知縣黎堯勳移建於舊學東半里許創蓋大成殿東西兩廡明倫堂齋館號房射圃亭時以戟門櫺星門內鑿泮池立職官題名碑此今之學宮也

尙書湛若水記畧聞之人傑者地靈然地靈者亦人傑其感應同也舊學地卑以隘莫稱高明廣大之教或曰學東半里許有名宦鄉賢祠隙地乃東嶽廟廢址其土燥其址高四尺中有古杏一株杏壇之兆已默定矣南數十步爲龍遊河河九十九灣南出大江北爲運河紆徐縈迴東入於海地勢坤風氣萃乃爲稱之因以舊地易之前爲文廟廟如制左右爲兩廡又前爲戟門去廟

十丈又前爲櫺星門去戟門十二丈兩門之間有泮池池有橋亘一丈後爲明倫堂左右爲齋爲館又爲號房爲射圃亭其規模則穆穆乎若增而深遠矣其屋宇則巍巍乎若增而高大矣然而爲廟爲學同也學以敷教廟祀以報本同也院縣協孚政和教行羣工歡騰於肆多士懽頌於庠其心又同也往來古今之通六十年之遠也上下尊卑之殊其士其民之億萬之衆也其翕然願爲斯舉者何心哉其宇宙感應之同然者也其萬物天地一體者也昔者夫子生于魯轍環於列國北不濟河南不及淮雖有浮海居夷之想而不果足跡未嘗掩維揚之墟今之祀報師法乎孔氏者盡河以北淮以南

極天所覆地所載以莫不然不期然而同然豈特維揚已哉於是有以悟天地萬物同體之理而得其所以同然之心必自知聖人之所以爲教在於斯有天地罔極之恩焉其能不報祀於無窮乎知學者之所以學在於斯有宇宙一體之意焉其能弗自強不息乎

祭酒鄒守益記畧臯學舊在西南隅地當下流泮池莽如湖蕩滂則灌於學宮宮日圯諸師生蹙蹙然欲徙而費鉅工繁莫或任之嘉靖己亥秋侍御疎山吳公悌慨任其責發兩淮運司罰金九百餘兩以屬於黎尹堯勳曰予倡之子其和之或議塞泮池之半遷廟而前之諸師生瞿瞿然不安也曰址弗堅其何以永縣東南隅嶽

廟舊址介鄉賢名宦祠間形勢爽塏風氣完固若貿舊學以佐新費可以不擾而濟復請於侍御范溪焦公璉公曰因舊弗堅孰與創新可久仍移預備倉以拓其址於是黎侯遴能以鳩役傭力以紆工稽程以祛蠹殿廡堂齋門寢祠亭及師生廨號咸次第如制式麗以鞏始於嘉靖庚子三月成於十一月朔合師生而落之南離東廓子守益曰二三子之新其學也其視諸學宮乎居下流以受澇則眾駑駘矣填淤淖以建役則眾瞿瞿矣徒高就剛式麗以鞏則眾訢訢矣若移是以切磋慎獨之學報倡以和慎終以始奚患其茂濟乎世之獵經史組詞華以媒時好決短垣而潰之將非居下流以受坻

乎矜事爲急功烈內蘊詐力而外覆以仁義將非填淤淖以建廟庭乎二三子其毋自安焉戒慎恐懼須臾不離力振舊俗而新之則蘊爲天德發爲王道可以參兩間而覆幬百世豈惟二三子無惡於志其於聖代敷教之休良師作人之績庶曰永有賴乎

教諭吳元職官題名記畧臯學舊無題名碑嘉靖庚子黎侯樂溪慨舊學之卑隘毅然改遷謀諸詹君亦沂何君學丹始命工伐石以紀其名夫名也者生於實之有餘者也顧而思盡其實吾輩之志也且國家之遴選教職也試之春官試之天曹試之大廷然後拔其尤者授之官其選任之重如此旣任之後諸司紀其德行錄其



道義或獎之旌之或疏其名而剋薦之其禮遇之重又如此夫上之人既重之下之人獨不自知其重乎立厥德以重其趨淑厥教以重其任子弟之善者成之不善者威之毋詭俗以爲通立異以爲能毋僞廉以取毋僞忠而要毋僞避利祿而以薄媒厚毋僞鄙官卑而以謙飾詐相與砥礪以表率髦俊興禮讓之風敦孝弟之行正朝廷而正天下庶乎三代之遺矣否則後之人考其名而指之曰某也賢某也不肖某也取重於天下某也不爲人所重其榮辱爲何如乎

二十一年巡鹽御史胡植修

二十九年知縣陳雍修

如臯縣志

卷九

學校

八

三十二年巡鹽御史黃國用次第增修

大學士李春芳記畧臯學缺陋未飾觀者惻焉嘉靖壬子冬侍御黃國用按其土謁先師孔子迴瞻宮宇而嗟曰是焉足以嚴妥祀安絃誦哉矧陰陽向背多舛其宜乃捐罰鍰若干金召節推符君允中畫而示曰是宜革是宜創是宜闢是宜塞宜崇而坵宜濬而流符君受命惟恪率邑令陳君雍庀材鳩工相度經紀蓋五閱月而緒甫就規制煥然改觀矣旣落之日章縫悅懌黎庶歡踊有魯泮水大小從邁之盛焉予惟教化治道之所先也故有匡世翊道之志者恒注心焉文翁之在蜀倪若水之在汴范純仁之在襄邑率興學廣教以隆化理後

世述頌不衰黃公之用心豈異昔賢哉然興學闡教以  
作材弼理者上之責也崇德邁行以強學待聘者士之  
責也爲士者嘗慨上焉者無其人矣今將誰咎乎孔子  
稱十室之邑必有忠信不如某之好學如臯僻在海隅  
習尚淳厚士多忠信之資抑有好學如孔子者否乎孔  
子之學非攻藝射名之謂也所以學道也盡其性以盡  
人物之性以贊化育以參天地孔子之學也發憤忘食  
樂以忘憂不知老之將至孔子之好學也轍環齊魯之  
墟席不暇煖孔子濟世之心也今之學果如孔子之學  
與所以濟世之心乎惟藝是攻而無得於心性惟名是  
急而無裨於天下國家甚之營私蠹公毒痛細民并其  
如臯縣志

卷九

學校

九

所謂忠信者亡之矣夫天下之治忽繫人才人才之邪  
正繫學術孔子之學不明則忠貞之才不出欲求海內  
又安難矣今黃公以正學倡之於上異時有好學之士  
卓然爲天地立心爲生人立命俾孔子之道大明宇內  
謂非公之力哉

三十八年知縣童蒙吉重修又拓學前地十二畝六分有  
奇以廣明堂氣象恢宏規模濶大

萬歷二年七月學爲風潮毀塌

四年知縣鄭人達修始築宮墻

祭酒姜寶記畧安定胡先生故如臯產也趙清獻公闕  
道則斯邑舊令君也援安定之教以新舊俗而先躬行

又援清獻公之崇學校禮師儒以勉進其爲令長者則東郭鄒公與郡先輩太僕蜀岡盛公少師石麓李公亦嘗後先相繼記之矣茲焉修葺乎癸五以來所頽損而未備復徵予言也予言其能有加於諸公也歟雖然請舉諸公言所未卒者申言之孔子設四科以教門人遂爲萬世立教之宗主後代師傅稱最得孔氏法門者莫如蘇湖而蘇湖之置經義治事二齋若專爲文學政事而設科也而德行言語之誘掖固亦默存乎其中矣當時及門如孫莘老范忠宣輩純明直溫各有所表著而立朝言論風旨若王明叟兄弟則所謂善爲說辭者其陶鎔當亦有所自也然則安定之教不誠善矣乎今之

司教者課書升散之外無聞焉甚則併課書升散亦廢矣今之教於學者口耳詞章之外無取焉甚則併口耳詞章亦荒矣中間有高於人者自謂直指此心言下領悟往往外人倫遺物理罕格致誠明之功緒而但以談元吐奧爲勝及其出而仕也旣無濟於用又欺世而弋名入往往慕效之而不知其非也於戲敝也久矣故予嘗謂課書升散以爲師庸師也口耳詞章以爲儒俗儒也此爲學舍之蕪陋而已矣外人倫遺物理但以談元吐奧爲師儒而實則無濟於用乃師儒之空疎而自文者此爲學舍雖設徒飾外觀而已矣若夫竊講受之名以欺世者此假學舍之修以叨有能名而究其歸則朽

木而雕黑黃蒼赤而不以法故第毀瓦畫墁之徒其志將以求食焉爾夫國家建學以教士養才邑令君奉行國家德意以修學而冀以教士養才也其又何用有此歟今臯學遷矣陰陽向背補飾其缺漏矣若殿堂若齋舍若門若坊旣修葺而備矣師必無愧於蘇湖其弟子必無愧於安定之弟子鄭君之留意學校與師儒也又不愧趙清獻之令臯豈不咸有以永終譽也歟

九年巡鹽御史任養心修

十年署知縣江都教諭馬晨修補築迤北磚牆會受代去工未竟東北一帶尚仍舊土

二十三年知縣陳煥修

如臯縣志

卷九

學校

十一

二十八年知縣張星修

三十年教諭黃夢麒移泮池於櫺星門之外建東西二石橋曰文德武德

修撰朱之蕃記畧初櫺星門闕地沼焉以爲泮駕二石梁其上然泮無蓄水若坑阱然形家數言不利於多士黃野王先生曰相厥地宜面河流而環帶泮自天造安用此坑阱爲則有白下之制可做也於是請於縣大夫蘄州張公比諸御史臺咸報可乃賦丈度貲庀材撰吉鳩工興卒堙舊坎而夷之泮則徙而外因於河造雙梁於左右費凡若干緡筆工於萬歷壬寅秋越甲辰夏乃報竣事則張大夫遷而今邑侯惠安陳公繼成之也雙

虹對峙兩厓甃石內夷坑阱爲坦途外布石欄臨活水  
蓋巍乎大觀云橋成之明年乙巳先生遷分宜令往矣  
臯大夫士謀紀石而問記於余余惟橋富平而民利涉  
功德至今不泯千古如一日也然慮始最難故富平之  
役成人主乃舉酒勞元凱曰非君不能成此野王以一  
廣文而倡是舉乃有成績則又難之難者

邑人冒日乾記畧我臯左溟渤南大江學海文瀾襟控  
前後淮流自北折而東二渠紆洄環城內外若縈帶而  
學宮翼然臨於渠上苞孕靈淑洵扶輿之勝概也因渠  
爲泮秀若天設而乃甃池於櫺星門內若蹄泮然士議  
徙之久矣頃奉中丞檄飭治學宮士復持前議念方告

如臯縣志

卷九

學校

十一

緇不敢重縻帑金僉願捐貲從事而鄉先生之奮迹膠  
庠者亦慨然有水木之思樂輸以佐之而邑大夫某愷  
悌作人嘉與多士更始爰庀材量工白狀當路而後徵  
惠先夫子之靈蓋荷畚待命者麋集而成且以不日矣  
仁侯右文明師造士而賢士大夫相與共襄厥美君子  
謂是舉也恢廟貌闢風氣模緒宏遠矣

四十三年知縣李廷材葺櫺星門東西兩廡西齋

四十五年知縣熊奮渭修明倫堂西廡

四十八年巡鹽御史蔣以化檄建尊經閣

大學士葉向高記畧夫六經之傳於世也猶之乎一曜  
五行之運於天也何臚何魄何若木何崦嵫何生尅虛

旺若者紛紛之說乎殺之爲畫鳴之爲籟錯綜之爲文字緣飾之爲經緯條晰之爲是非故時灰於秦燄錮於魯壁經不見阨也旣鐫之蘭臺講之白虎誦之郡國校之天祿石渠經亦不見榮也夫經固自尊耳學聖人者烏得而不尊之夫宣尼以天縱之資彙千聖之統其於經也且雅言焉筆削焉韋編三絕焉今士人授一經童而習之各學一先生之言於他經輒目爲駢枝彼此不能舉其概且於其所授一經亦僅訓詁帖括以應功令而取世資卽之以實用茫如也此惡在其尊經哉然則士子之尊經亦尊之以心足矣奚必以閣曰聖人卽心以爲經者也而凡人則借經以惕心人處幽黯之室無

所不恣焉登明堂入清廟而神勃然悚矣手斷蠹之編覆甃代枕無所不忽焉開牙籤觀緗帙而心凝然肅矣今竺乾苦縣兩家弟子崇奉師說且必居以琳宮紺宇飾以金函玉笈朝夕齋心祓手而後敢啓吾儒轉弗若乎此非以閣尊經也欲以閣而惕人心使知所以尊也臯學舊未有閣學博蔣君欲大創之以告邑令李君李君曰是吾任也遂與蔣君約一切經畫規制出納教護悉以厯蔣君而李君則爲升嘉肺之金以佐工餉閣楹五高六十尺廣袤稱之下軒廠可布百餘席課諸生其上八窻瀕洞左右列朱櫺受經及諸史籍之翊經者閣成李君顧而悅之憑闌遠眺爽然有鴻飛天際之思焉

曰是可以尊經矣

按文中學博蔣謂蔣紹燿邑令李謂李衷純

天啟三年知縣李衷純增修大成殿東西兩廡櫺星門啟  
聖宮

大學士朱國禎記畧夫學所由來昔矣三代以上大道  
元同家詩書而戶絃誦負鋤耒牧之士莫非譽髦先王  
猶必設之膠序董之師儒其經制何宏遠也明興統一  
教化聲洽寰宇郡邑之士慮無不爭自祓濯以希光於  
日月而有司視先師鐘簋之地直若彼黍之宮旣屋之  
社卽有念水木而重賢關者亦惟是畫丹塗聖以幾映  
一時之耳目云爾其爲造無斲規不朽者誰其人與元  
白李公爲令東臯以治行特聞月一再行學宮顧瞻廟

如臯縣志

卷九

學校

古

貌欬垣朽棟不蔽風雨乃盡撤其舊而增廓之不半歲  
落成於是進諸生遊肄焉公時與上下揚扃甄拔其所  
材循誘其所不及格臯人士益激揚鼓勵思以若於雅  
化將遙羽天衢相嗣而登金馬石渠之署者歲常不乏  
今天子冲聖旃厦之學與湯銘俱新方且筮日戒蹕行  
臨雍釋奠之典而郡邑之吏能先意獎順於以粉黼太  
平藻潤宏業助聖天子同文之化詎非賢有司之事乎  
茲三陴告變中原之盜蟻合蜂聚而維揚一隅謚然莫  
安三靈叶調萬寶登熟雞犬桑麻安堵無擾謳吟絃誦  
之聲自闐闐以達村墟必非無因而致也詩曰旣作泮  
宮淮夷攸服噫蓋我先師之鐘虞實式靈之矣

國朝順治十四年知縣崔鳳賓修

學政張能麟記畧揚之東臯江海裔壤也而安定胡先生實篤生此慶歷間教授生徒東南俊秀翕然以理學爲宗天子至下湖州取其教法以爲太學程至今俗尙節誼彬彬乎質有其文藏修游息莫不於泮宮卒業焉舊制宏敞一經兵燹日就傾頽無復起而修之者予特捐俸百三十緡爲之倡邑宰崔君鳳賓及邑之賢士大期工竣學博請予爲之記予惟學之不修也久矣始以時納費鉅懈而不修不修則廢廢則不可修而愈難於修天下類如是而修之則竟修矣天下事有不可爲者

如臯縣志

卷九

學校

五

哉昔西山真氏以修學之義譬之爲學今入其廟而見夫棟梁基構崇隆而堅固也可以知學之有本矣簷楹榱桷鳥革翬飛可以知學之有章矣不煩公帑不役細民可以知四端在我求則得之不少欠闕矣顧乃曠而不居舍而不由放而不之求可乎今者廟貌維新藏修遊息不患無其地矣而予猶復有勉焉者讀聖人之書要知義理之所在義理旣得發爲文辭其文辭必靜深而可久然非言之難而行之難亦非行之難而合於聖人之爲難有本資之以立德有章資之以適用其於修學之義不相發明也哉安定之澤未艾也多士思無負聖天子崇儒重道之意當於是勉之矣



邑人石璜序畧自古郡邑莫不有學雄偉焜耀嚴嚴翼翼多士揖讓其中摩揉徒革日底於善而教者以勸掖之意須累積之功以待學之就則人心純材之成則士習正而朝廷得人豈非其游息有所鼓舞不倦也哉然而歷年久遠學壞且廢當事者憂然不顧多士不知所趨而人之體性容止惟其所肆治事經義之學無復淵源可考卽有茂敏純厚之士而無薰陶之漸則其學之不就材之不成無惑焉已矣臯學承變革之後遷延不修而規模如故嘗爲周覽瞻眺有堂有殿有藏書之閣有棲士之舍園橋壁水龍游玉帶蜿蜒廻繞文峯矗聳雙虬偃仰氣象宏麗宜茲多士代有名賢如安定之正

學龍圖之直言忠節之大義又其尤者夫非此學之所造就哉然顧廊廡傾頽殿角圯謝北地崔程二公來蒞茲土學將賴以一新而二三君子又相與踴躍而躬先之僉謀費出同學無外求者則材有不賦而就匠有不鳩而集功有不迫而成矣夫當積久圯壞之學有工費之浩人力之艱固非創建所易致者惟其令之一倡而三百餘人莫不響應而圖之如恐不及且不遺餘力而奎閣廻樓園橋壁水環抱固結風水涵毓及觀其成諸生日講習不輟順其愛慕發憤之心養其醇和溫厚之性以進於修身齊家經國平天下之大務必有名儒高第崛起其間而垂德業於永遠也豈不偉哉

康熙十年邑人蘇世威募築宮牆易土以磚知縣趙宏化重修東西兩牌坊

十三年邑人吳伯遠胡邦棟姜迂譽冒起蒙請復學前射圃創建屏牆

請復射圃碑記畧如臯射圃舊在學宮內後以其地爲教諭署因移置泮水之南而以屏牆蔽之牆南有仇信學地十二畝六分有奇自牆直至南城下歲月旣深居民視爲閒地或潛跨而有焉始於尺寸漸而尋丈實逼處此侮聖人而蔑王章愆莫大焉好義之士冒起蒙姜迂譽胡邦棟聯名籲請於學使簡虞二憲行縣清占以示永久復斥資築泮池前宮牆十有二丈

如臯縣志

卷九

學校

七

按明教諭呂克孝學圃小記明堂空地原奉海道明文創置入學東西兩旁今屬勢家日漸侵蝕蓋屋阻塞屢諭不聞今自吳伯遠等請復後又百有餘年矣

童志載儒學前地北一段原係生員何諍等五家地共計十畝八分三釐五毫東長五十八弓止仇信地界西長五十二弓止新填通江河西崖外及馬應禎地界南口四十六弓半止溝中學地界北口五十二弓止官河南一段原係省祭官仇諍地計一畝八分北接東長四十六弓止仇信地界西長四十七弓止仇信地界南口九弓止學田界北口九弓止溝中學田界南接東長九弓止仇信界西長十二弓止仇信界南口十二弓止城

下路北口十三弓止學田并仇信地共該田十二畝六分有奇嘉靖三十九年知縣童蒙古教諭謝紹祖置甚屬詳明

雍正十年知縣彭履仁教諭丁宏遠訓導慶勰率紳士重修大成殿尊經閣崇學育才二坊四圍宮牆

學院張廷璐記畧學校王政之本也人才於是乎出風俗於是乎成故致治之盛衰視夫學之興廢今文運昌明天下莫不有學復發

內府金錢數十萬繕治曲阜之文廟其所以尊崇之者至矣朝廷既備典禮而省會郡邑寧不益感奮激勸以襄茲盛治哉已酉冬余奉

如臯縣志

卷九

學校

六

簡命視學江蘇按臨崇川道經臯邑臯固安定胡先生龍圖王學士之鄉也一樹正氣於神宗之朝一崇雅樂於景祐之世風節卓卓可師他如何柏齋之諫孫淮海之學許忠愍之忠賢達之盛後先輝映逮乎我

朝炳炳琅琅翰苑闡臯方興未艾謂非臯學淑氣之所鍾毓與顧百餘年來風摧雨蝕學宮之朽蠹傾圮殆不可言臯令彭君履仁廣文丁君宏遠慶君勰慨然以重修爲已任師儒一倡多士響應鳩工庀材寒暑無輟兩閱歲落成余時試事告竣過臯城周覽學宮見門序正位講藝之堂藏書之閣以及棲士之齋櫝器之所宮牆內外無不嚴嚴翼翼壯偉宏麗謂非一邑之鉅典而數百年

學之盛舉乎夫教育有地則人才益盛人才益盛則習俗大醇由一邑而一郡由一郡而天下教化行而風俗古邽隆之治不於是觀成哉是役也縣宰首倡捐俸廣文襄事維勤而邑之紳士踴躍捐修若朱學濼若沙潛龍若范選若徐建中若宗芳三若石立所輸俱不下百餘金徐建杓更倍之以完厥工總其事者則沙潛龍朱學演石立之力居多云

乾隆十三年五月初四日烈風傾倒學宮各房屋知縣鄭見龍教諭王之進訓導姚蘭具文申詳

十四年八月奉藩司飭縣勸捐

十五年知縣鄭見龍教諭任之鏞訓導周旋率紳士重修如阜縣志

學校

教諭任之鏞修學啟如阜安定先生故里也都人士循循雅飭卓犖不羣知經義治事之教流風餘韻猶有存者已巳秋余司鐸於此仰前賢之踵武輒欲一謹庠序顧周視大成殿暨兩廡及明倫堂尊經閣雖規模具在而棟薨剝落楹桷蠹蝕勢將不支未嘗不惶然滋懼蓋阜學自明嘉靖庚子遷建於茲百三十年洎我

朝康熙辛亥邑人蘇世威實重新之越今又八十年矣不及此早爲之計徒日事補苴甚非所以肅大典而光文治也會上憲加意學校修治之檄巽命重申邑侯淳安鄭公蒞任三載政簡刑清百廢具舉慨然引爲己任而屬余共勸乃事余思平人構一室必預度庀材若干聚糧

若干計工若干儲蓄歲月用觀厥成此何如事寧僅一手一足之力耶既而思際此

重熙累洽人文蔚起之時觀萬仞宮牆之岌業反不如梵宇蓮臺之金碧輝煌人誰無心况臯夙多好義如崇聖一殿吳君來儀不惜千餘金獨力創建至今實嘉賴之今日之議修雖工鉅費繁然衆擎易舉直發蒙振落耳如諸君不吝解囊芳名永垂不朽於以答邑侯倡始之盛心以不辜各憲培植之雅意是所望於同志者棧樸之詩曰溥彼涇舟烝徒楫之靈臺之詩曰經之營之庶民攻之不日成之蓋言戮力同心之可以共濟而踴躍趨事之易於觀成也余本株儒不揣樗櫟艷慕美舉恭疏短

如臯縣志

卷九

學校

三

引幸不河漢余言

十八年邑紳分認修理

大成殿併月臺石欄杆係沈全道黃紹祖黃衍劉光遠倪天恒朱永聰崔聿修韓永卿張志爵張士餘等公修用銀九百八十八兩三錢

東西兩廡兩掖門係石立朱濂朱之瀚趙鷄年仲萬邦王大溥劉漢詔公修用銀四百五十五兩二錢五分戟門鄉賢祠名宦祠係張大安馬兆祥汪元福劉正興公修用銀三百二十五兩五錢

尊經閣係范選獨修用銀八百六十四兩六錢五分明倫堂係汪之珩獨修用銀三百五十四兩七錢

魁星樓係徐建杓獨修用銀五十三兩七錢八分

櫺星門大門係仲之珍獨修用銀七十五兩四錢六分  
敬一亭係叢灝石孚同修用銀五十二兩

東牌坊係朱廷宸等認修用銀六十一兩二錢

西牌坊並泮池北邊石欄杆二十丈係洪世揆洪世揆  
同修用銀一百一十五兩六錢八分

泮池東西兩大石圈橋係吳執衡獨修用銀六百三十  
兩

泮池南新建石欄杆二十丈係張書也獨修用銀一百  
二十兩

萬仞宮牆係石景羲重建

如臯縣志

卷九

學校

三

知縣陳琨碑記余嘗閱宋史見高宗紹興十四年謁孔  
子廟止輦殿門外御敦化堂此後世明倫堂前號也又  
是年胡氏安國子宏與業高閱書曰太學明人倫之所  
在蓋本孟氏學則三代共之皆所以明人倫之意至寧  
宗慶元二年紫陽朱子白鹿洞臨川縣令修孔子廟請  
書堂額朱子書明倫堂三楷法應之此明倫堂所託始  
矣元明及

國朝凡郡縣學堂額稱朱子書者皆臨川鈞本漢唐以後尊  
儒重道之典獨隆於宋一時創書修復莫不有文以傳  
之如歐蘇曾王諸學記至今可考信乎學爲一邑士大  
夫矜式之地可使廟貌不常新哉然余往往過大都邑

瞻仰聖宮至有頽敗零落無以避風雨者則又云何蓋  
舍宇廣則資費巨歷年久則振興難餼廩土木之用煩  
則捐銀於一姓非必瘠上不材人士之倦於修善也江  
南如臯縣爲通州屬邑居淮南而濱海西共風土民物  
文章莫不都雅往代迄今邑乘具載乾隆癸酉春予奉  
命出宰都邑走謁夫子廟堂則傾圮亦且久矣他日廣文先生  
任君之鏞錢君燦來告以興復之計且曰前令鄭公會  
議修之工甫集鄭公以疾去今不可不有以速繼成其  
美第計修舉之費惟大成殿明倫堂尊經閣資用甚大  
恐遷延歲月而茲舉將復不終也予始亦惴然憂之未  
幾而殿閣各有所成獨茲堂最後而邑人汪君任之揆

如臯縣志

卷九

學校

十一

日鳩工不俟終日工將起汪君復來請曰舊製前後殿  
閣皆用筒瓦獨茲堂瓦異何於大聖人之宮而前後殊  
觀耶請用筒瓦與殿閣等又於堂之前礮石爲臺縱橫  
開廣計二丈許而堂之基地益尊大可觀此則前志所  
無而汪君剗始者也夫施不必博而貴於當財不難於  
用而貴於誠嘗見當時士大夫家僧樓道院不惜金寶  
錢穀什百萬計以爲供養而於一切有關風化教養之  
重反視之漠然不爲料理者何可勝數汪君尊聖人之  
居感明倫之大毅然行之有補於尊儒重道之術者何  
限予覽邑志知君先世積有潛德尊大父梁若先生尊  
公千頃君嘗爲漏澤園納米穀以惠無告雍正甲辰海

潮大嘯古豐場溺死者無算先生樸瘞暴尸至三千五百餘公協營書院平糶賑饑凡邑有大舉每以不肯爭先攘臂爲耻嗚呼此以見君之好善輕財其來有自闕五月工竣乃爲記勒石於堂之西偏汪君名之珩字楚白號璞莊議敘鹽政提舉倜儻非常詩古文尤博雅云三十六年邑紳史鳴臯范曾輝朱昂徐觀政等公請捐修大成殿經義齋治事齋敬一亭忠孝祠土地祠遺愛祠週圍磚牆東西廡至名宦祠鄉賢祠戟門係沈爲麟等認修櫺星門下馬牌係仲元鼇等認修明倫堂係汪爲霖認修尊經閣係范遜認修崇聖殿係吳執衡認修魁星樓係徐觀政認修東牌坊係朱之瀚等認修西牌坊係石鉉石銳如臯縣志

卷九

學校

三

石鑄石鉅等認修萬仞宮牆係石鐔石鉉等認修泮池石欄杆係張殿武認修

邑人史鳴臯記是役也經始於癸巳之春三月以迄於仲冬又續作於甲午之春三月以迄于季秋閱十有四月而告厥成焉其程工也認修者曰明倫堂曰魁星閣曰啟聖名宦鄉賢諸祠曰西廡東齋東西坊曰萬仞宮牆曰戟門大門櫺星門曰泮池石欄皆各或費千金或數百十金捐貲自修以圖永固其公捐也重葢者曰大成殿曰尊經閣徹新者曰東廡曰西齋改建者曰

御碑亭重築者曰雲路圍牆新增者曰正殿階墀曰尊經閣鋪

地曰學前石路其用公費也計用銀一千七百十八兩



錢一千三百二十七貫是役也認修者不惜已費而務力肩公事董修者不糜公費而如圖厥家事是以材無因就厥惟良工罔冒浮厥惟實旣整且飾亦鞏以固翼翼嚴嚴可以永年矣旣落成列敘認修公捐工某處及數如干另鐫之石余旣用勸於作始矣茲樂記其觀厥成也迺率諸生而告之曰而亦知夫學校之所以興乎譬諸甲第開闔則衣冠集焉子弟之克家者旣肯堂復肯構旣勤垣墉復塗丹雘果何修而云爾乎夫積行以培其基立志以植其幹瞻之乎禮樂詩書以飭其材澤之乎文采詞章以致其飾于是乎人才蔚起而煥然爲學校光舍力學無由也諸生勉乎哉又是役也勸捐董事者八人而庀材鳩工朝夕省視則石氏袁氏更懋厥勤焉

三十八年知縣崔正音教諭趙俊訓導陶國果率紳士重修改敬一亭爲

### 御碑亭

三十九年黃衍修葺學宮頭門八字牆

五十八年知縣曹龍樹教諭秦鼎雲訓導宋長溶率紳士范維鍾朱大剛吳鼎祚陳秉仁沈爲樑袁守泰朱洪達等勸修大成殿大成門及兩廡

六十年修戟門名宦祠鄉賢祠及泮池石岸

嘉慶六年吳積忠等重修崇聖殿

八年訓導宋長溶添築得樹齋三楹

九年張殿武同姪振鼇等重修泮池石欄杆

十年石萬泰萬溥萬淦等重修西牌坊

十三年吳功祐等重修崇聖殿

十五年知縣事左元鎮教諭汪元琚訓導宋長溶率董事勸捐尊經閣江西督糧道張溶捐銀五百兩徐宗永湯述會捐錢俱數十千郭純臣捐錢三百二十千諸紳士捐輸姓名銀數悉載題名匾額十七年知通州直隸州事唐仲冕撰文知縣事趙庭椿教諭汪元琚訓導姚澍勒石

十七年監生葛志魯偕弟志許獨力重修銅錫祭器教諭汪元琚訓導姚澍註冊移縣知縣事趙庭椿給匾褒嘉申如臯縣志

卷九

學校

三

勵之

署知縣事孟肇紀記略禮器與樂器相爲表裏者也周禮司尊彝司几筵之屬實居大司樂之先

至聖先師備四代禮樂朱子嘗謂舊禮器圖式不如政和間考遺法鑄造制度精密氣象淳古則禮器之重可知矣如臯爲胡安定先生之鄉安定律呂議於黃鐘之管度量權衡辨察綦詳而禮器顧未之及豈以樂器之制難審而禮器之制易明歟按臯學建於南唐保大十年歷宋元以來閱四百餘年而禮器未備明天順間邑紳葛君錫任蜀長壽縣尹始慨然捐貲製造

國朝乾隆二十四年其後裔名立名韜者因舊制增修嘉慶八年葛氏兆麟等具呈願修旣而未果迨嘉慶十四年前制府大學士松公檄修各學祭樂器葛君錫勳齊名志魯志許昆季樂施好義承學博汪君姚君勸捐請獨力重修特聘維揚工人將學存簠簋尊壺籩豆百餘事一一增修罔弗完備余適承乏攝臯篆喜見禮器之成將與安定樂器之制並傳也臯之人士其彬彬然興於禮樂未艾乎爰爲之記

二十一年六月邑紳徐宗永獨力捐貲購石版鋪大成殿前月臺及中甬道左右兩丹墀東西兩甬道九月告成知縣事沈濤教諭汪元琚訓導鄭樵勒石

如臯縣志

卷九

學校

三

學政王以銜記略夫事之創始者衆人之所屬目也雖歲遠時遷後之人猶將考其姓字而稱道之余恭膺

簡命典試

江南按臨通屬道出如臯攷邑乘臯庠建自南唐至

明嘉靖十九年移建縣治之東南隅規模濶大視舊制不侔矣大成殿前爲月臺爲甬道爲左右丹墀舊係甌鋪第甄質易損不能持久嘉靖迄今二百四十年間不知幾經修葺矣如邑爲胡安定先生故里邑之士夫尊儒尚義至今弗衰豐利場徐君篤信君子也與學博汪君元琚爲婣戚每相過從瞻殿前地甌多殘缺惕然不安請於邑令陳君玉成願捐貲易之以石期在歷久不敝陳君亟稱美之爰鳩工庀材不遠千里購石於宜興

之張清山計用巨石版一千餘片於嘉慶二十一年又  
六月開工學博汪君爲之勸董其事三閱月而告成  
是役也可謂勤矣從此多士之趨蹌

聖廟者履殿前坦蕩之磐石詎不爲升堂入室之基也哉徐

君之祖名德健父名承浩本生父名旭罔弗爲德於鄉  
君名宗永字詠堂山西鹽課大使以子貴誥封朝議大  
夫其子朗官浙江運副誠慤有父風工詩余採諸輿論  
知徐君居恒樂於爲善歲饑則捐金以資賑濟時旱則  
掘井以暢泉源施絲衣以禦冬寒割腴田以爲義地其  
於周急弥患恤孤矜寡之事殆難縷數今此舉尤爲獨  
任其大壯觀瞻而期攸久固無意於求名而名不朽矣

如臯縣志


卷九


學校

五

工竣勒石學博汪君請叙於余余嘉徐君之志而樂觀  
厥成也故濡墨而書其事

二十二年監生張超率子步衢重修忠孝祠





如臯縣志

卷九

學校

又三六

學宮圖說

中爲大成殿殿東西爲兩廡前爲戟門又前爲櫺星門東廡北爲宰牲所又北爲東掖門西廡北爲神厨又北爲西掖門後爲明倫堂東爲居仁齋西爲由義齋堂後爲尊經閣閣後爲崇聖殿閣西爲遺愛祠祠後爲土地祠戟門東爲名宦祠西爲鄉賢祠北爲教諭署又北爲訓導署櫺星門東爲儒學門又東爲奎光樓北爲敬一亭卽

御碑亭

又北爲忠孝祠門東西爲興賢毓秀二坊外爲泮池東爲文定橋西爲武定橋南北石欄南爲屏墻墻三門墻外爲射圃爲木碑一爲石碑凡二十五址縱七十九丈橫二十三丈四圍宮墻凡一百九十四丈六尺

崇祀 從祀附

宋真宗祥符二年始封聖考為齊國公

元文宗至順元年加封啟聖王

明世宗嘉靖九年改封啟聖公

十年別建啟聖祠春秋祭祀以顏無繇曾點孔鯉孟孫激左右配享俱稱先賢以程珦朱松蔡元定兩廡從祀俱稱先儒

二十二年以先儒周輔成從祀

國朝雍正元年改啟聖祠為崇聖祠追封孔子以上肇聖王木金父公裕聖王祈父公詒聖王防叔公昌聖王伯夏公啟聖王叔梁公並為王爵

如臯縣志

卷九

學校

三

二年以先儒張廸從祀定神主位次

崇聖祠

肇聖王木金父公正中南向

裕聖王祈父公東一室南向

詒聖王防叔公西一室南向

昌聖王伯夏公東二室南向

啟聖王叔梁公西二室南向

配位先賢顏氏無繇孔氏鯉東配西向先賢曾氏點孟孫氏激西配東向

東廡先儒周輔成程珦蔡元定

西廡先儒張廸朱松

儀注歲春秋仲月上丁同日致祭行兩跪六叩首禮餘與大成殿同

祭品正位前各帛一羊一豕一鉶二簋簋各二籩豆各八爵三尊一鑪一鐙二四配位各帛一簋簋各一籩豆各四爵三東西各羊一豕一尊一鑪一鐙二兩廡從位東二案西一案均簋簋各一籩豆各四每位爵一東西各帛一羊一豕一尊一鑪一鐙二俎籠罍勺具

漢明帝東巡至魯祀孔子及七十二弟子

曹魏文帝祀孔子以顏回配

晉宋梁陳隋皆以孔子爲先聖顏回爲先師

唐太宗復以顏回配左邱明以下二十二二人並令配享

如臯縣志

卷九

學校

三

高宗始以曾參與顏回並配

元宗爲塑像詔顏回曾參像宜坐

宋神宗始以孟子配食文廟又增荀況楊雄韓愈三人從祀

理宗淳祐元年詔周敦頤張載程顥程頤封爵與朱熹並從祀孔子廟廷

景定二年加張栻呂祖謙二人並從祀

咸淳三年以顏回曾參孔伋孟軻並配孔廟四配遂定又升顥孫師於十哲列邵雍司馬光從祀

元仁宗以許衡從祀

文宗加封顏回爲兗國復聖公會參邾國宗聖公孔伋沂



國述聖公孟軻鄒國亞聖公是年冬追祀董仲舒

明正統二年以胡安國蔡沈真德秀吳澄從祀

宏治八年以楊時從祀

嘉靖九年考正祀典定四配爲復聖顏子宗聖曾子述聖子思子亞聖孟子十哲閔損冉耕冉雍宰予端木賜冉求仲由言偃卜商顓孫師東西兩廡祀澹臺滅明以下六十二人稱先賢左邱明以下二十二二人稱先儒去從祀者一人申棖又罷公伯寮秦冉顏何荀況戴聖劉向賈逵馬融何休王肅王弼杜預吳澄十三人增祀后蒼王通歐陽修胡瑗陸九淵五人而以蘧瑗林放鄭衆盧植鄭康成伏虔范甯七人各祀於其鄉

如臯縣志

卷九

學校

五

隆慶五年以薛瑄從祀

萬曆間以羅從彥李侗王守仁胡居仁陳獻章從祀

國朝康熙五十一年升先儒朱子熹爲先賢列於哲位

五十四年以范仲淹從祀

雍正二年復祀蘧瑗林放秦冉顏何鄭康成范甯六人增祀縣廩牧皮樂正克公都子萬章公孫丑諸葛亮尹焞魏了翁黃幹陳淳何基王柏趙復金履祥許謙陳澔羅欽順蔡清陸隴其共二十人

乾隆二年復吳澄從祀

三年升有子若於哲位始稱十二哲

至聖先師孔子木主位大成殿正中南向復聖顏子述聖子思

子東配西向宗聖曾子亞聖孟子西配東向

東哲先賢閔子損冉子雍端木子賜仲子由卜子商有子若

西哲先賢冉子耕宰子予冉子求言子偃顓孫子師朱子熹

東廡先賢蘧瑗澹臺滅明原憲南宮适商瞿漆雕開司馬耕梁鱣冉孺伯虔冉季漆雕徒父漆雕哆公西赤任不齊公良儒公肩定鄒單罕父黑榮旂左人郢鄭國原亢廉潔叔仲會公西輿如邾吳陳亢琴張步叔乘秦非顏噲顏何縣曾樂正克萬章周敦頤程顥邵雍

東廡先儒公羊高伏勝董仲舒后蒼杜子春諸葛亮王通如臯縣志

卷九

學校

三

范仲淹歐陽修楊時羅從彥李侗呂祖謙蔡沈陳淳魏了翁王柏趙復許謙吳澄胡居仁王守仁羅欽順

西廡先賢林放宓不齊公冶長公皙哀高柴樊須商澤巫馬施顏辛曹卹公孫龍秦商顏高壤駟赤石作蜀公夏首后處奚容蒧顏祖句井疆秦祖縣成公祖句茲燕伋樂欬狄黑孔忠公西咸顏之僕施之常申棖左邱明秦冉牧皮公都子公孫丑張載程頤

西廡先儒穀梁赤高堂生孔安國毛萇鄭康成范甯韓愈胡瑗司馬光尹焯胡安國張栻陸九淵黃幹真德秀何基陳澔金履祥許衡薛瑄陳獻章蔡清陸隴其

乾隆七年禮部議准先師先賢先儒木主位次

先師位高二尺三寸七分濶四寸厚七分座高四寸濶七寸厚三寸朱地金書東西配位高一尺五寸濶三寸二分厚五分座高四寸濶六寸厚二寸八分東西哲位高一尺四寸濶二寸六分厚五分座高二寸六分濶四寸厚二寸東西庶位先賢木主式皆與東西哲同先儒木主高一尺三寸四分濶二寸三分厚四分座高二寸三分濶四寸厚一寸

康熙十四年

欽頒萬世師表額懸大成殿

雍正三年

欽頒生民未有額懸大成殿

乾隆五年

如臯縣志

卷九

學校

三

欽頒與天地參額懸大成殿

嘉慶六年

欽頒聖集大成額懸大成殿

名宦鄉賢祠在大成殿之西南嘉靖十六年泰州同知署如臯縣陳大壯創爲之今移祠名宦於大成門之東祠三楹祠鄉賢於大成門之西祠三楹上丁日祭

名宦位次宋縣令曾易占胡令儀明知縣仇昞胡昂徐相黎堯勳

國朝總督傅臘塔學院張泰交總督于成龍鹽法道周亮工

巡撫張伯行學院余正健大學士蔣廷錫總督李衛

鄉賢位次宋天章閣侍講胡瑗龍圖閣學士王觀孝子丁

天錫元延祐三年解元平江路總管陳應雷明右都御史  
寧夏巡撫冒政監察御史馬繼祖福建布政使左叅議冒  
鸞海豐知縣劉瑗太子少保南右都御史謚文定何塘太  
子少保南工部尚書謚文恭孫應鼐廣西布政使蘇愚雲  
南寧州知州冒夢齡新泰縣知縣李上林光祿寺署丞李  
伯龍

國朝贈中書舍人范永贈中憲大夫范育

戶部侍郎葉相記臯舊無名宦鄉賢祠同知泰州事陳  
公來視邑篆瞿然興曰是長民者之責也乃考求乘籍  
參訂耆宿名宦得先事知縣曾公易占胡公令儀及胡  
公昂數賢鄉賢得安定胡公瑗龍圖學士王公覲孝子

如臯縣志

卷九

學校

三

丁公天錫及知海豐劉公瑗監察御史馬公繼祖參議  
冒公鸞數賢乃周爰相度得地之良於丁孝子祠之故  
址遂取材於廢宇而用不廢帑貿工於贖入而民不告  
勞匝月而祠成爰神有楹繚楹有垣門屏牲歆器皿咸  
備邑吏民在公在野無小大咸忻忻懷思興起謂當有  
述也乃問於相相曰賢乎邦大夫之務德以化民也不  
亦遠乎蓋標準立則民自趨風聲樹則民自感勸戒昭  
則民自化舉措不外人情而感應捷於桴鼓賢乎邦大  
夫之務德以化民也不亦遠乎按祭法曰功在於民者  
祀之仰惟諸賢德愛若曾嚴正若胡嘉猷善政澤被於  
臯臯之民至今懷其惠也不衰茲非功在於民者乎又

曰法施於民者祀之若胡之理學王之忠鯁丁之孝誠及篤行如劉風節如馬純正如冒大足以師表百世小可以範淑鄉閭臯之人得所依歸茲非法施於民者乎孔子曰見賢思齊焉又曰三人行必有我師焉吾黨之士仰先哲之高蹤漱餘芳以自淑有不欲思齊者乎三人行尚足以得師矧諸賢儀型森布式序吾人誦讀其詩書尚論其世曰某宦績若何吾思其所以爲官某鄉行若何吾思其所以爲人師不在茲乎詩曰高山仰止景行行止願與吾黨之士相共勉之陳公名大壯嘉靖己丑進士爲特書麗石以告我後人云

邑人嚴怡述安定祠自昔有之專祀安定先生王公祠

者宋龍圖閣學士王公觀之先塋也舊侵於僧嶺南梁公始力復之因於垣外作祠題學士主祠焉丁孝子祠者梁令汎掃東嶽廟而爲之者也比有詔建啟聖廟有司過計其值而自入焉乃撤孝子祠爲之因耐其位於王祠而孝子祠廢爲隙地矣今年仲秋上丁大祀之明日洛陽裕菴陳公祀王公祠見孝子位耐食學士壇次則感然曰孝子有靈其不依人之墓而食學士有靈其不忍其祖若考之不食是其於鬼神爲賣於人理爲非情也則又曰鄉先生如安定其人宜有專祠名宦鄉賢宜遵詔令祠祭公於是卽孝子祠地以經營撤僧屋之在野者贖入之在官者屬冠帶義民張慥協工曹司吏

秦許董治之再旬而事竣乃卜是月二十四日奉主入祠自爲文告祭之其以名宦祀者自曾公易占以下若而人以鄉賢祀者仍以安定先生爲主次龍圖學士以下若而人皆名實無媿幽明者也其於安定祠則以先生之伯子志康仲子志寧配焉於王祠則學士之王大父載伯考惟清考惟熙從弟觀從孫俊又父祖子孫皆得同堂而合食焉是公於神人之理可謂察之彰明處之詳盡百年曠典一朝舉之也可以風勵夫生茲土者焉可以風勵夫官茲土者焉

忠義孝悌祠在儒學門內雍正九年建祀明贈鎮國將軍都指揮使朱顯忠吏部員外郎謚忠愍許直孝子鴻臚寺如臯縣志

卷九

學校

三

序班許文炳義民盧禎

國朝孝子貢生徐宏成生員石京陝西副將贈總兵官冒重光孝子朱龍雲

遺愛祠在尊經閣西

土地祠在遺愛祠後

禮儀

省牲之禮前期一日晡時承祭官分獻官各具補服詣省牲所廵一匝北向立以西爲上待禮牲者折身曰充贊者曰告充畢禮牲者又折身曰膾贊者曰告膾畢并瘞毛血贊者復引承祭官分獻官詣神廚視滌漑畢退釋奠之儀正祭日分獻陪祭各官入兩旁門序立贊引

一人對引一人導承祭官至盥洗處盥手畢引至臺階下立唱樂舞生就位執事者各事其事分獻官陪祀官各就位文舞生執羽籥引進贊引贊就位承祭官就拜位立分獻官隨後立唱迎神唱舉迎神樂奏昭平之章樂作贊引贊跪叩興承祭官陪祭官分獻官俱行三跪九叩頭禮興樂止唱奠帛行初獻禮唱舉初獻樂奏宣平之章樂作贊引贊陞壇導承祭官由東階上進殿左門贊引贊詣

至聖先師孔子位前承祭官至案前立贊引贊跪叩興承祭官行一跪一叩頭禮興贊引贊奠帛奠帛者捧帛跪進承祭官受帛拱舉立獻畢贊引贊奠爵執爵者捧爵跪

如臯縣志

卷九

學校

五

進承祭官受爵拱舉立獻畢行一跪一叩頭禮興不贊贊引贊詣讀祝位承祭官詣讀祝位立讀祝者至祝案前一跪三叩頭捧祝板立於案左樂止贊引贊跪承祭官分獻官讀祝陪祭各官俱跪贊引贊讀祝讀祝者讀畢捧祝板至正位案前立跪安帛匣三叩頭退樂作贊引贊叩興承祭官及各官行三叩頭禮興贊引贊詣

復聖顏子位前承祭官就案前立贊引贊跪叩興承祭官一跪一叩頭興贊引贊奠帛捧帛者跪進於案左承祭官受帛拱舉立獻案上贊引贊獻爵執爵者跪進於案左承祭官受爵拱舉立獻案上行一跪一叩頭禮興不贊贊詣

宗聖曾子次

述聖子思子次

亞聖孟子各位前獻帛獻爵如前儀其十二哲分獻官陞壇奠帛獻爵如承祭官禮兩廡分獻官如承祭官禮畢贊引贊復位承祭官分獻官各復位立樂止唱行亞獻禮唱舉亞獻樂奏秩平之章樂作贊引贊陞壇獻爵於左如初獻儀贊引贊復位承祭官分獻官各復位立樂止唱行終獻禮唱舉終獻樂奏敘平之章樂作贊引贊陞壇獻爵於右如亞獻禮贊引贊復位承祭官至殿內立捧酒胙二人捧酒胙至正位案前拱舉至飲福胙位右旁跪接福胙二人在左旁跪贊引贊跪承祭官跪贊

如臯縣志

卷九

學校

三

飲福酒承祭官受爵拱舉授接爵者贊受胙承祭官受胙拱舉授接胙者贊引贊叩興承祭官三叩頭與贊復位承祭官復位立次行謝福胙禮贊引贊跪叩興承祭官分獻官及陪祀各官俱行三跪九叩頭禮與唱徹饌唱舉徹饌樂奏懿平之章樂作徹訖樂止唱送神唱舉送神樂奏德平之章樂作贊引贊跪叩興承祭官分獻官及陪祀各官皆行三跪九叩頭禮興樂止唱捧祝帛饌各恭詣燎位捧祝者捧帛者至各位前一跪三叩頭捧起祝文在前帛次之捧饌者跪叩捧起在後俱送至燎位承祭官退至西旁立候祝帛饌過仍復位立唱望塵唱舉望塵樂樂作贊引贊詣望塵位導承祭官至望



位立祝帛焚斗贊禮者贊禮畢退

祭品正殿陳設帛一爵三牛一羊一豕一登一大羹鉶  
二和羹簋二黍稷簋二稻粱籩十棗栗芡菱榛形鹽藁  
魚鹿脯白餅黑餅豆十菁菹芹菹笋菹韭菹醢醢鹿醢  
兔醢魚醢脾析豚胎罇一有勺

四配位陳設每位帛一爵三羊一豕一鉶一和羹簋二  
黍稷簋二稻粱籩八榛芡菱棗栗鹿脯形鹽鯧魚豆八  
韭菹菁菹芹菹笋菹醢醢鹿醢兔醢魚醢罇一

十二哲東西位陳設每位帛一爵各一羊一豕一鉶各  
一和羹簋各一黍簋各一稷籩各四棗栗鹿脯形鹽豆  
各四菁菹芹菹鹿醢兔醢罇一

如臯縣志

卷九

學校

三七

兩廡東西十二龕陳設每位帛各一爵各一每四龕羊  
一豕一簋一黍簋一稷籩四棗栗形鹽鹿脯豆四菁菹  
芹菹鹿醢兔醢罇一

祭器祝版爵登鉶簋籩豆罇篚罇桌牲匣帛匣木盤  
香案香爐燭臺供桌毛血盆酒杓滌桶羹碗

乾隆二年復增犧罇象罇山罇壺罇著罇罍罇太罇銅龍  
勺繡龍罍俎盤連桌

按爵登鉶簋籩雍正二年頒行圖式皆沿舊制以瓷器  
乾隆二年更正惟爵用瓷登鉶簋籩用錫酒罇仍用銅  
增犧罇等七罇用精鐵

乾隆二十四年邑人葛立葛韜因其遠祖官四川長壽知

縣葛錫於明天順時曾捐置銅爵等貯臯庠又復捐鐵瓶  
二鐵燭臺四銅鼎一銅瓶二銅爵百三十五銅酒樽一銅  
盞二銅簋二銅豆八銅籩八銅焚帛盆一銅爵二十銅盥  
盆一錫大方燭臺二錫方花瓶十二錫方香爐六錫酒樽  
四錫中方燭臺十二錫大圓燭臺十二錫小圓燭臺十一  
錫小圓香爐八錫中圓香爐八錫大獻盤一錫中獻盤四  
錫花酒壺一錫沙池一錫提爐二錫毛血盆七木籩豆二  
百六十木帛匣九木牲匣十八大犧牲槃一石香爐二十  
二木供盤三十黃紅布桌圍十八祝版二木香案桌一黃  
緞桌圍一祭器木櫃二鐵庭燎四器用咸備知縣何廷模  
請獎之

知縣何廷模記如臯縣儒學文廟有祭器舊矣歲久缺  
壞僅有存者每春秋祀事輒多方移用器具弗供禮可  
知也攷縣志自前朝天順間邑紳葛君錫宦成後曾捐  
貲備諸器如制今舊器之存者欸識尙存可辨嗣後無  
過問者年代浸遠剏做幾盡丙子秋余來視事明年胡  
君嗣齡秉鐸茲土暇日爲余言相顧咨嗟以簿校紛甚  
未遑籌此歲已卯勸邑中士紳捐置樂器將以次爲茲  
事畫而葛君之十世孫立與其弟韜願獨力辦余聞而  
嘉之具狀申上憲請給匾額予之旌並賜諸生冠服如  
奉祠樂舞生例今所重置者已一一如舊制啟聖祠及  
堂廡應用器莫不成備爵豆俎尊之屬煥然一新可謂

盛矣獨計葛生雖爲宦裔而家資未及中人乃能慨然以此自任加人一等葛君之爲善有後葛生之克紹前徽均可傳諸不朽余故樂爲記之且勒石俾邑人士世世知有葛君祖孫交相勸云

嘉慶八年葛氏裔孫兆麟兆桂兆蘭等復具呈重修

樂器乾隆十五年鄭志載存麾節編鐘編磬鏞鼓琴瑟簫管笛排簫塤箎祝敵籥翟干戚傘

二十四年邑紳士捐置大成鐘一大成鼓一鳳鼓一鼗鼓二搏拊鼓二琴四瑟二排笙二排簫二紫簫四龍笛四鳳笙四塤二箎二金鐘四玉磬四編鐘八編磬八祝一敵一麾幡二龍節二黃緞曲柄九龍傘一羽翟四十二籥筒四

如臯縣志

卷九

學校

三

十二樂器木櫃一今歷年已久不無缺失損壞

知縣何廷模記周禮樂師掌皇舞敔舞其旌人教舞散樂夷樂樂之有舞古也有其器無其人不能爲古樂焉有其人無其器亦不能爲古樂焉廷模承乏臯邑祀

先師於上丁問所謂樂舞者鬱湮已久心缺然憂之丁丑歲學憲晉寧李公檄取舞生八十八名賜冠帶籥翟俾習儀每試異冊申牒列諸童子生前寵異之模與鄉大夫鄉先生議勸置諸肆春牘絃匏笙簧各如制遴諸生之敏者受教於知樂之師月餘咸精其能今歲仲春之祭堂上堂下升歌間歌肅雝和鳴舞人剡剡起武善爲禮一容綴兆罔愆觀者異音同歎喜模有志之竟成也慮無

其繼雖美弗傳乃錄諸器名目贖記之交司鐸省視藏於其署之左右今并錄諸好義姓名勒諸石碑後來爲政者有所考以時補其缺而教其譜器壞則修藝精更習庶不負

國家尊師之意與二三君子扶持學校之苦心模雖他去回

首宮牆其亦可區區稍慰也乎

碑載捐貲紳士二十二人董事五人

〔樂章〕迎神奏昭平之章奠帛初獻奏宣平之章亞獻奏秩平之章終獻奏敘平之章徹饌奏懿平之章送神奏德平之章

〔祝文〕乾隆九年

欽頌正殿祝文惟

如臯縣志

卷九

學校

罕

先師德隆千聖道冠百王揭日月以常行自生民所未有屬文教昌明之會正樂和禮節之時辟雍鐘鼓咸恪薦以馨香泮水膠庠益致嚴於籩豆茲當仲春秋祇率彝章肅展微忱聿將祀典以復聖顏子宗聖曾子述聖子思子亞聖孟子配尙饗

崇聖祠祝文惟

王奕葉鍾祥光開聖緒盛德之後積久彌昌凡聲教所覃敷悉循源而遡本宜肅明禋之典用申守土之誠茲屆仲春秋聿修祀事以先賢顏氏先賢曾氏先賢孔氏先賢孟氏配尙饗

忠義孝弟祠祝文維靈稟賦貞純躬行篤實忠誠奮發

貫金石而不渝義問昭宣表鄉閭而共式祇事懋發倫  
之大性摯莪蒿克恭念天顯之親情殷棣萼模範咸推  
夫懿德

綸恩特闡其幽光祠宇維隆歲時式祀用陳尊簋來格几筵尙  
饗

節烈祠祝文維靈純心皎潔令德柔嘉矢志完貞全閨  
中之亮節竭誠致敬彰閩內之芳型茹冰蘖而彌堅清  
操自勵奉盤匱而匪懈篤孝傳徽

絲綸特沛乎殊恩祠宇昭垂於令典祇循歲祝式薦尊醪尙饗

學額

歲貢年分明洪武十七年後歲貢三十年後無貢永樂元  
如臯縣志

卷九

學校

聖

年後連歲貢惟十年二十年闕正統三年後間歲貢廩生  
四十歲者皆入貢景泰元年至五年連歲貢天順二年後  
間歲貢六年令四十五歲以上皆入貢是年一歲貢十人  
而六年後又連歲貢成化二年後間歲貢宏治元年後間  
歲貢十一年後連歲貢正德元年後間歲貢十五年貢二  
人嘉靖元年二年連歲貢三年後間歲貢十一年十二年  
後連歲貢二十三年後連貢間貢不等隆慶萬歷泰昌天  
啟皆間歲貢崇禎連歲貢

國朝二年一貢儒學上其名於學政考試給貢單貢入太學  
廩增額數廩膳生員二十名增廣生員二十名不知何時  
悞缺增生一名

國朝乾隆十六年教諭任之鏞詳請仍復原額

生員科舉額數明萬歷已酉以前科舉十九人錄遺無定數天啟元年知縣李衷純力請於學使者得增三人儒士科舉一人錄遺一人

國朝初科舉三十人或三十五人或四十人康熙年間科額漸廣解無定數或百人或八九十人遺錄復倍之乾隆九年頒定科場條例額稍減焉

童生入學額數明入學額數增減無定天啟二年知縣李衷純請增入二人

國朝順治元年後十六人十年後十五人康熙十五年後減

三人止十二人十六年入學三人有賫助兵餉者得充生

如臯縣志

卷九

學校

望

員無成數十九年仍復十二人後又增五人雍正元年

恩廣五名舉行一次四年增額五名連前增定額二十二名乾隆

元年二年額外廣五名十七年二十二年二十八年三十

一年四十六年四十九年六十年皆額外廣四名嘉慶元

年六年比額外廣五名武童入學定額十三名

書籍五經大全各一部 五經一部 五經旁訓一部

禮記摘註一部 四書大全一部 四書一部 四書摘

註一部 廿一史全部 天祿閣外史一部 通鑑一部

通鑑紀事本末一部 文獻通考一部 廣文選一部

白虎通一部 朱子全書一部 性理二部 崇古文

訣一部 理學文鶴一部 明倫大典一部 楚詞一部

韓文一部 明祖訓大誥律令一部 楊忠愍公文集一部 王心齋集一部 陳白沙文集一部 文心雕龍一部 小心齋劄記一部 日新要語一部 四藝考一部 太上感應篇一部 爲善陰騭四部 五倫書一部 孝順事實一部 覆瓿語一部 藝圃球琅一部 維揚嘉靖志一部 鎮江志一部

按以上係前明貯學書籍廬志載各書遺

國朝乾隆二年頒發

上諭四函計四十四本 十三經註疏十六套計一百二十本

日講四書解義四函計二十四本 性理精義二函計十本

四年頒發

如臯縣志

卷九

學校

三

御纂朱子全書各一部六十四本 周易折中各一部二十四本

書經傳說各一部四十八本 詩經傳說各一部四十

八本 春秋傳說各一部四十八本

五年頒發

上諭一本

御批資治通鑑各一部共十六套一百六十本 孝經衍義各一

部六十四本 廿一史全部四百九十八本 明史一部

一百十二本 學政全書一部八本

欽定四書文四函四十四本

按以上係州志所載不確難憑考核

上諭二十四本

聖諭廣訓一本

上諭二本又一本

聖諭廣訓五函二十本

上諭條例九本又二冊未訂

欽定三禮一百二十八本

御批綱目二部十六函

御製詩文

詩初集二  
集文全集

樂善堂文集三十六本 又一部缺一本  
原繳還

欽定四書文三部六十六本

南巡盛典四十八本

日講四書解義二部

如臯縣志

卷九

學校

器

盛京賦二本 周義折中二部二十四本 詩經傳說三部七

十二本 書經傳說二部半缺一  
上兩六十本 春秋傳說三

部七十二本 周易述義四本 詩經折中八本 春秋

直解六本 大學衍義一部十二本 孝經衍義四部六

十四本 十三經註疏無學庸  
公羊 性理精義三部十五本

廿一史全部四百九十六本內缺北  
史一本 明史一部一百

一十二本 綱鑑續編二函 朱子全書二部八函 唐

宋詩醇二函 日知薈說二函 聚珍板二函二十七本

又聚珍板十八種未訂 學政全書一部又二本 又

一部二函 律纂條例一冊 訓飭士子文 官員接見

儀注一冊 文廟碑文十冊 吏部則例兼六部二十本



禮部則例全部 平定金川碑文十本 改教詩碑文

四函 清漢對音一本 近思錄一部四本 科場條例

一本 江蘇冊結式一本 在學書處 壇祠祝文儀注一本 今無

祭器樂器圖一本 今無

按以上係學庫存書若干

大學衍義輯要二本 衍義補輯要六本 四禮翼一本

四禮初稿一本 失 司馬公傳家集十二本 正史約

十六本 呂子節錄二本 孝經註解一本 小學纂註

二本 失 近思錄集解二本 在官法戒錄二本 從政

遺規二本 紀年便覽一本 養正遺規一本 訓俗遺

規二本 教女遺規二本 豫章學約一本

如臯縣志 學校 卷九 墨

按以上係江蘇巡撫陳宏謀發存臯庠書若干

乾隆五十五年黃興祚捐送書籍計七千一百九十九卷

尚書彭元瑞記

本朝重熙累洽

列聖相傳罔不本經術為陶冶

御旨諸書炳若日星

頒發學宮昭示來哲

今上集羣聖大成壽應期頤猶日孜孜

命儒臣輯四庫全書並

賜二分藏之江浙許令士子就讀美矣善矣巍乎煥乎自有天

地以來未覩斯盛也第窮簷孤士既不獲躡屩擔簞聲

石室名山之秘惟帖碑一經終年學舍徒慨想於所未及見者正多矣而如臯黃叟適有捐書之舉黃叟名與祚字紹翼號芝田邑布衣也其先世故多藏書課子若孫外分其副本指送儒學

欽定

淵鑒類函以下計書四千七百五十九卷又捐送書院書二千四百四十卷附焉邑之學博士已請於郡守學使者垂久遠矣而又乞余文爲之記余嘗兩奉

簡命

視學江左知邑多藏書家然皆私爲帳中枕秘不輕示人

黃叟獨分惠藝林俾嗜書者寢饋之而又無借緘還緘之煩良義舉哉夫書猶田也佃者利之無田者不得耕也今黃叟以其田爲公田則人人得而治之而收穫之如臯縣志

卷九

學校

異

熙朝盛事愈有以助

聖天子文治之隆哉余固嘉其志而樂爲道之斯更有望於聞風興起者

嘉慶八年黃理續捐送儒學書籍計二千七百十七卷兩共計一萬九百十六卷因卷目浩繁未經查核現存學冊可稽

邑人戴聯奎記韓子有言莫爲之前雖美弗彰莫爲之後雖盛弗傳斯美者盛者不盡彰且傳也然有其始之

欽頒典籍外故無藏書芝田布衣慨然出鄴架之餘捐送附皮

後必有繼焉如黃氏捐書邑學可徵已邑學尊經閣奉  
彭芸楣尙書爲文記其事時乾隆庚戌越十三載其子  
理續承先志又增益之計書共一萬零九百一十六卷  
經史子集靡不大備視他郡庠所罕有邑人士朝弋而  
夕漁焉惠之所及豈淺鮮哉宜制府陳公方伯康公皆  
嘉尙之檄載於志予日侍

禁近去鄉久不獲躬親其盛樂聞之爲識數語書諸石於以  
歎黃氏父子之先後相媲美也不旣傳而益彰乎

學田

明天順八年教諭周鼎置縣北八里莊田八十畝原係民  
如臯縣志

卷九

學校

聖

人張福一地東止路外及張圯地界西止岸外及蘇家地  
界南止溝中界北往南一灣止溝中界

童志云給饌堂柴薪呂志載曹忠種盧志載租銀二兩  
七錢鄭志同

又置縣南二十里官莊田一頃一畝六分六毫原係民人  
朱裝地計三段一段坐落蒲湖三十七畝一分一釐八毫  
東止溝中李鶴界西止岸中阮家界南止溝中陳祿界北  
止溝中陳瑤界一段莊家屋基田五十七畝二釐八毫東  
止溝中范愚界西止溝中吳鬻界南止溝中沈言界北止  
溝中孫湧界一段李應禎田七畝四分  
童志缺書此段界止并脫六釐二字  
呂志作孫煜種三十二畝五分雍銑種三十二畝五分

阮講譙種二十七畝五分冒高種九畝一分六毫盧志  
載租銀共五兩九錢一分鄭志同

嘉靖三十九年知縣童蒙吉捐俸置買縣西七里夏家園  
二百三十二畝七釐原係民人章枝地坐落官路北計一  
塊東長五百零一弓止溝中外及章謙章詳地界西長四  
百七十二弓止溝中外及章謙章詳地界南口一百二十  
七弓半止溝中外及官路界北口一百一十一弓止溝中  
外西一半止張稼地界東一半止章枝地界

呂志載張勤種盧志止載二頃三十畝租銀七兩五錢

鄭志同

又置縣北二十里柴市灣東北田一頃二十七畝有零原

如臯縣志

卷九

學校

巽

係爲盜滅門人錢寧地計八段住基下一段前後連墳園  
四段東止溝中外及史諍地界西止錢寅南止池中徐  
尊地界北止岸界住基前東橫田路西一大段路東一小  
段東止岸西止溝南止溝北止路住基前西橫田東一大  
段西一小段東止路界西止岸外周連地界南止溝中外  
徐尊界北止路外錢宴界住基東徐家監田東止岸外錢  
週界西止岸外錢深界南止溝中外錢宴界北止溝中外  
周淵界住基西北盧家園東止岸外錢寅界西止岸外錢  
寅界南止池中界北止溝中外江銘界一段座落河西稻  
田十六畝東止周洋地界西止周文錢福地界南止周洋  
地界北止周本地界嘉靖四十三年奉學院耿明文帖

錢寧房弟錢宙等三分均受訖

又置儒學前十二畝六分三釐五毫

童志詳載四止今移射圃呂志云租銀四兩九錢盧志云改爲射圃鄭志同

又原存學田縣南天生港楊文彩四十一畝九分

呂志租銀一兩二錢五分盧志云因江湖坍沒續遷久安小圩楊文秀承種租銀二兩鄭志同

又原存學田縣北十三里許家莊西官田五十畝

呂盧鄭志俱載租銀二兩

萬歷十三年增縣南六十里天生港西薛琴田十二畝四分一釐零

如臯縣志

卷九

學校

完

呂盧鄭志俱載租銀六錢

三十八年生員錢體元與范瀾爭告北關外街西瓦房一所送學助建尊經閣公用租銀九兩

三十九年本府趙發到犯人劉細紀家莊田二百二十七畝並住房園林樹木

按此項田房隨經署印訓導谷瀾申請賣價助建尊經閣公用在卷該租銀十七兩九錢呂志云二項田變價完工不在學田之數

又增縣東一百里豐利場桑昂田十七畝八分

呂盧志作送鄭志作置俱載租銀一兩二錢

四十年增縣北三十里楊蠻河北陳林田二十一畝零

呂盧鄭志俱載租銀一兩六錢

四十一年增縣北二十里張家莊石成瑜田六十六畝內  
草蕩四十三畝熟田二十三畝

呂盧鄭志俱載租銀三兩三錢

四十二年增縣東一百一十里馬塘孔家莊管日坤田七  
十三畝八分

呂盧鄭志俱載租銀三兩三錢

又生員丁確送縣西丁孝子塋外田七畝以供香火

呂志租銀一兩盧志作三兩鄭志同

又縣東白蒲鎮河南官田二十四畝

呂志不載置年租銀八錢盧鄭志同

如臯縣志

卷九

學校

五

又湯家灣田一匡楊家河田一匡

按二項呂志云不知何年置入向係兩齋訓導收租查  
無卷案實數盧鄭志皆云不可考

國朝康熙三年詳允開墾學田一百二十九畝

盧志租銀五兩八錢五釐鄭志同

按以上解藩租田五百八十一畝本學徵收租田二項  
八十四畝六分零除湯家灣楊家河二項無考外俱查  
實田註冊

乾隆三年邑紳吳鳳翔子執衡捐田一百畝歲徵租銀二  
十兩永遠修葺崇聖祠

按此田租不入學遇修理係吳氏承認今此田既未入

學其租亦未入學歲修縣案可稽

四十二年邑紳徐觀光捐送水竹園田一百二十八畝歲徵租銀六十二兩一錢六分備儒學歲修

學政謝墉記

聖天子德化覃敷光天之下至於海隅莫不興學凡立學者莫不繕修宏整巍然煥然以丕昭文治使者奉

命視學江蘇乙未秋歲試三吳後渡江按揚及通於是屬邑如

臯修學工竣學博士謁余曰臯學歲久失修茲集邑之士大夫協乃心力亦既克襄厥成惟是無田無以歲歲事是以風雨鳥鼠之不時而侵削是虞有原任刑部員外郎徐觀光旣認修奎星閣復請捐水竹園田百二十如臯縣志

卷九

學校

五

八畝於學以其出租所入爲歲修費蒙上憲予可欲請錫言以記之予惟秉經稽古風示教諭以作興膠序廣樂育而答

盛明使者之事也習禮課藝躋講堂趨殿廡滌除黜聖相與

經理而整葺之博士諸生之職也歲入息數十金而以充實費之用則其保成功也鉅亦在善爲之而已且夫無歲不修歲不一修歲修之義也工固有之學亦宜然記曰蛾子時術之兌命曰敬遜務時斂厥修乃來言君子於學無時暫替所以俾勿壞也苟外飾爲文章斧藻而玩愒不修燕朋燕僻則秉間抵巇者日攻其內而腐蠹剝蝕之其爲風雨鳥鼠不亦多乎此亦宜鑑藝事而

知儆矣學者勗哉若徐君者自出其力而不尸其功殆先實而後名者耶歷歲無疆而慎修思永殆循名而責實者耶兩博士其善爲之俾書而貞諸石

嘉慶二年知縣曹龍樹發到韓百朋韓家洋田十六畝五分祝九龍承種租錢八千文備修學署

按學校志舊有鹽院項下田拼茶場曹盛二項二十七畝八分九釐八絲租銀四兩五錢四分呂志載本縣徵收貯庫聽用盧志註崇禎元年詳允撥入泰州徵解鄭志未載

十四年邑紳朱洪壽捐送十里墩七里缺三接橋等處秧園田二百一十一畝每歲租錢一百五十九千九百九十

如臯縣志

卷九

學校

五

二文以備士子鄉試盤費

洪道序吾鄉朱靜原先生係名進士鳳台公裔孫先生夙承家學體卹寒儒先是臯邑鄉試者二百人近今資斧艱難額數減半先生慨然曰有能壯其行囊奇材異敏之士何致沉淪草莽乎先生家非素封蓄志十年丙寅六月染疾在床語夫人方氏捐田三處計實田二百一十一畝每年額租錢一百五十九千九百九十二文爲寒儒鄉試盤費方夫人敬遵夫命捐產入公由縣詳州道司院定立章程批獎在案勒石明倫堂命子章鶴監成其事洵臯邑未有之盛舉也恐歷年久遠不免侵占竊賣諸弊今遵左父臺防微杜漸之美意將田畝住



落租息各憲批示暨規條要領俱載於左

一縣西十里墩秧園實田九十八畝二分每年額租錢六十九千二百七十二文

一縣北七里缺秧園實田七十九畝每年額租錢五千零五百二十五文除捐公田外尙有祖墳樹木墓基神道並田二畝不在捐田之內

一縣南三接橋實園田三十三畝九分每年額租錢四十千零一百九十五文

一租價交典生息止許一分俟鄉試之年按月按年計算若干

一鄉試之年酌於六月十五日將歷年息按年之先後如臯縣志

卷九

學校

五

月之多少結算共計租價息錢若干造冊由縣脩文移學以憑給發

一租息移學學預於六月十五日示知合學文生有情願鄉試者或係正案或考遺才俱令先期報名查其實無力者總計人數若干應派若干預先示知定于七月初一日在明倫堂給發至監生捐貢及作幕起文應試者不應給予

一徵收租價佃戶自赴庫完納給予收票經承每年量給紙張飯食錢四千文不得私自加租侵撈並私換佃戶租約

官保總督部堂鐵批朱洪壽捐田收租以爲士子鄉試盤

黃海屬義舉仰江寧布政司查明議詳請獎  
巡撫部院注批仰江寧布政司核明通詳飭遵

江寧布政使司許批仰通州覆核擬議詳司察奪毋違  
按察使司遇批據詳朱洪壽捐田入學惠及士林洵屬  
樂善義舉

常鎮通道趙批據詳該縣原任巡檢朱洪壽捐送田二  
百餘畝入公每年收息存典再爲生利逢鄉試之年以  
爲寒士盤費好義可嘉

本州唐批既據通詳仰候各憲批示

書院社學義學附

宋王俊乂書院在縣西北水澤丁天錫書院在窰子頭

如臯縣志

卷九

學校

五

元陳應雷書院在胡安定祠側許芳書院在縣北柴市灣  
按以上書院考舊志皆家塾今俱廢

崇正書院在學宮東南隅百步

國朝

雍正二年知縣曹樞建邑人胡香山沈宗聃袁士彪冒  
璽石景羲石立李士賢朱日躋共斥縣南沙田五百七十  
七畝五分零曰育材圩沈宗聃又斥田一百二十五畝曰  
復興沙共徵租米三百八十餘担以爲脩脯膏火之資乾  
隆十二年改爲育嬰堂

邑人胡香山記如臯故無書院宋以來家自爲塾其載  
在邑志者縣西北水澤王堯明書院窰子頭丁天錫書  
院安定祠側陳省元書院柴市灣許芳書院然考之舊

乘皆家塾非書院也桐川曹公奉

命法皇以學校人才爲先務嘗咨於衆曰此東南瀕海之爲

國家財賦之重地而又有舟楫往來斥堠守望之勞其士豈  
民情樸上面譁吾以爲皆科條繁瑣舍其本而逐於末  
也如臯舊爲文教之區倡於安定衍於太原而又有柏  
齋石溪淮海集民後先繼美鄉先生之風方盛大而未  
有艾所以長善類作士氣易易耳今諸生之從遊者日  
益衆歲課月試其所爲文清詞英辨者日益多而縉紳  
之家或能修明胡王之業其餘富而不知教子貧而不  
能崇師雖子弟英才偉質多沈錮其耳目聰明而罔有  
所振拔謂非長民者之責乎爰謀於鄉士欲立書院延

如臯縣志

卷九

學校

三

明師將仿經義治事齋之制焉鄉士曰是役也計非歲  
有常產不可以興事而垂久遠吾數人者任之其或有  
濟乎公悅請於上官報可衆乃捐臯南沙之田以爲買  
得戴氏之宅而更新之既成名曰崇正書院其講堂書  
室二十有餘間廣可容百人其地在學宮之東南相距  
數百步司教者得常至而稽之諸生之在書院猶其在  
學宮也昔縣治內宋有萬竹書院明有修篁書院後人  
豔稱之以爲有顯父鳴琴之遺然以語於教民型俗之  
大政公不且有過之而無不及哉

雉冰書院在縣治東北隅乾隆十二年知縣趙廷健建

按卽明張玉成露香池館故址爲邑人范大年別業趙

令捐俸得之改爲雉水書院袁士彪沈全道石立胡申  
穀李士侃冒天樞石鎬胡之本等呈請捐送崇正書院  
膏火田七百零二畝五分並入焉其聯事捐銀百金者  
徐建构沈全道黃紹祖石立鄭大綸黃衍汪起瀾朱玉  
徐承浩徐惠徐錦吳慥鄭建陳以璋康五柳捐五十金  
者典史沈昌國朱濂仲之珍仲之璜仲之琮徐承修沈  
嗣昌李大韶蘇秉智鄭人瑞捐四十金者徐建中崔永  
德范樞康五柳捐三十金者仲邦萬范曾耀朱永璵捐  
二十金者傅源丁益書又季有恒捐送丁家所田八十  
二畝歲徵租銀三十兩徐建构捐送市房一所歲徵租  
銀十六兩其始終董事者黃克業石爲壘鄭大綸徐建  
杓沈全道黃衍朱濂徐建中仲之珍

如臯縣志

卷九

學校

五

知縣趙廷健記乾隆十年教化翔洽文風丕盛正學碩  
德之儒臣濟濟盈廷足以軼漢唐而成三代之英乃

命翰林與大小臣工聯詠柏梁體賡歌喜起如遊熙皞之天焉

又

臨幸貢舉院憫恤儒生風簷寸晷進取艱辛爲之

賜詠紀恩曰從今不薄讀書人

綸綍之音海流風動雖窮鄉僻壤莫不感激興起以讀書人自  
期而況如臯乃胡安定先生故里先生學啟關洛道廣  
蘇湖而親炙於桑梓者其砥礪奮迅講道考業深入乎  
三有之域也尤爲不戒以孚廷健於其莅邑也始和月

吉飲射讀法與臯人士揖讓進退其諸魚魚雅雅望而知爲安定弟子與於時薦紳先生及國學鄉校諸生環而請曰如臯舊屬揚郡故郡城書院署以安定臯人士附從之邇年分隸通州合另建講堂用率諸生肄業但先是曹侯於泮宮池南肇基書院有育才圩復興沙田共七百零二畝五分歲收所獲用備師生束脩膏火浸傳浸怠而教與學因之中廢茲但飲金舉事大啟疆宇而不請歸舊田爲多士計恒產其何以計長久乎廷健於是上其事於各上官上官允所請爰卜宋曾文昭公隱玉齋西偏泰山墩之南麓構齋堂書室寢處庖福罔不具焉從古禮延通籍而優行者爲師俾縣鄉及隣邑

子弟咸來就學月旦望集而申倫常之義諸生業進者每有賞才富家貧不能裹糧者資之俾獲成田賦之出入主院事者司之日月有藉月考牘羸歲二會其數有餘則貯於他庫俟益田以廣其業後遷其旁育嬰堂於曹侯舊建小院而以其堂爲別塾課童蒙俟其長始赴書院受業故以義學爲附庸而統榜其正坊曰雉水書院如臯射雉借名於左氏春秋而易象爲離麗天明而華蟲藻火觀文化成郭宏農所賦赤岸銀濤又適當其境取義於水者正以其文心濬發洋洋浩浩韓之潮蘇之海足以想見其襟期淵雅也督學尹司空博野公聞而獎勸之署其堂曰立誠居業且親莅講學流示風聲

吾道大光斯文有幸書院之建其亦安定遺風籟鳴機  
動至今日而得一振與夫廢之興也固視夫專任之力  
亦必藉衆力之趨茲役之舉非分任諸君子樂善好義  
以助其成延健曷克底此後之總其成者亦如諸君子  
之樂善好義焉毋豐已以自私毋橐藥以啟釁毋狎匪  
類而教厥彘倫毋樹朋黨而雷同毀譽庶不負今日之  
助其成乎抑吾望受業諸生振振焉循循焉沐浴乎師  
儒之教而經明行修文章品識進於三代之英也

邑人姜任修記乾隆丁卯邑侯趙永齋式吾廬而請曰  
去年夏五接所示條例事宜首重建書院以興文學隨  
邀縣士大夫彙金卜宅延師授徒修辭立其誠有以居

如臯縣志

卷九

學校

五

業矣故督學尹公賜以立誠居業之額並請史筆記其  
略以傳之走惟侯以名進士起家大令文章學術海內  
已洽然從風而社稷經綸之士又必竭盡其所以任父  
母師保者蓋侯之宅心一塵不染而侯之勤政百廢俱  
興渙其德音作其士氣飲之食之教之誨之文物盛而  
功名玉成書院時設直可與金陵之鍾山吳閭之紫陽  
維揚之安定梅花千秋同一軌也鄉之士大夫若某某  
者斥田若干頃捐費若干金構屋若干間課士若干人  
脩脯若干束膏火若干資刊布詩文若干費巨細精粗  
備物致用不且足以多其好義赴功成侯之美哉然有  
其興之惟其繼之昭茲來許是盛必傳保此以滋大庶

幾于書院之不朽也

乾隆十七年王大溥捐送馬塘場張家莊田四十二畝二  
分歲租銀十兩徐惠捐送掘港場鮎魚灘田一百二十畝  
歲租銀十二兩石立捐送北門外園田十九畝三分歲租  
銀十七兩一錢朱濂捐送北門內鶯頸灣坐東朝西店房  
一所租銀五兩四錢朱學陽捐送與伊弟濂同房租銀三  
兩六錢濂又捐送東門外城內基地二方租銀二兩三  
錢三共房地租銀十一兩三錢唐元音捐送西門外蒲行  
南首並南廂磨子橋共田五畝草房三間租銀四兩九錢  
六分黃衍捐送縣南張家圩三至五號田一百十二畝九  
分九釐歲徵租豆三十一担

如臯縣志

卷九

學校

五

三十年徐錦捐送岔河鎮市房一所計五十三間租銀七  
十兩又田四畝租銀四兩共銀七十四兩

知縣張起鳳記如邑建立書院近二十載初移育才圩  
沙田五百餘畝供給公用邑紳各有捐助歲入之租僅  
足備山長脩膳會課士臨期一至欲休之膏火俾平時  
寢饋其間道無由也予莅任後敬禮山長引掖生童有  
志之士日加奮勉而謀及資斧則始基綦薄勸助維艱  
有邑紳徐良弼者鄉之善士里人凌雲負其貲九百金  
良弼臨歿遺命子錦呈請捐書院膏火予鑒其忱詳請  
上憲凌雲猶抗不償雲死其子復蹈父轍歲乙酉予爲  
嚴追欲懲以法以其田房抵錦錦以父有成命涕泣呈

請入冊歸公予維良弼慷慨好施其子竟承厥志不以  
費財旣得旋生靳惜有良弼之創義始得其子之繼美  
有錦之堅請益彰厥考之誠心是父是子良可嘉也旣  
定案申報大憲兼請褒揚並允可大中丞閣部莊公給  
額曰繼志成美學憲少宰梁公給額曰承堂繼美守道  
憲陳公給額曰承志育才絡繹褒嘉雲章焜耀更准勒  
石以垂不朽徐氏亦可得爲善之榮矣脫好義者感而  
效之踵而增之得更益數倍資斧日豐人才日衆書院  
增一下帷攻苦之士卽藝林中多一束圭璧之儒豈  
不以徐氏父子爲嚆矢兼有裨於學校也夫田房在岔  
河鎮市房五十三間歲納租銀七十兩田四畝歲納租

如臯縣志

卷九

學校

李

銀四兩並誌以傳永久云

三十六年書院置買金大明東楊蠻河河北田五十三畝  
又丁禹川東楊蠻河官河北田十四畝二共租銀二十八  
兩

三十七年書院置買西場北曹家菴宗篤齋仲雲衢共田  
八十六畝租銀二十六兩又置買仲柳原陸家淺北首田  
二十二畝租銀七兩五錢

五十九年喬善江蔡捐送常盈沙范家圩東三號田二十  
三畝歲徵米每畝七斗共米一十五担一斗知縣曹龍樹  
暫改每歲納錢九百文共錢二萬七百文又契外借券銀  
一十三兩俱送入書院膏火



六十年陳栢林名下租種田八畝租錢二千四百文捐送  
人無稽

如臯縣志

卷九

學校

空

院長題名錄

周植 崑山人乙丑進士

陶鎔

王康佐 號厚齋句容人壬戌進士翰林院

胡彥穎 號石田浙江德清人進士翰林院編修雲南主考

朱嵩 號維嶽浙江紹興人進士江西奉新縣知縣

馮應榴 號星實浙江桐鄉人辛巳進士鴻臚寺卿

錢維喬 號竹初常州人舉人

宮煥綸 泰州人

史鳴臯 號笠亭邑人辛未進士廣西柳州府知府前翰林院庶吉士

蔣宗海 號星巖丹徒人 召試中書壬申進士

如臯縣志 卷九 學校

吳哲 號枚原常州人進士

馮垂範 丹徒人乙酉舉人

熊大有 江西人舉人

錢

仲鶴慶 號松嵐泰州人甲戌進士四川大邑知縣

何廷模 號西舫浙江仁和人丁卯舉人海州知州前邑令

陳森 江寧舉人

黃世墀 號柏心徽州人明經舉孝廉方正

曹復元 號月帆金山人丙辰舉人

陳玉敦 號受棗浙江錢塘人舉人內閣中書舍人

許承志 江寧人癸酉舉人

黃 洙 號滌人揚州人庚戌進士山東肥城知縣

宮增祐 號節溪泰州人癸酉順天副榜

秦永年 號雪鴈無錫人廩貢侯選訓導

張士凱 號 滁州人乙未進士直隸懷安知縣

社學明洪武八年建四十二里額設社學八十四所

嘉靖三年知縣梁喬升改設一十五所在縣治者二日育

秀日正蒙馬塘場日小治掘港場日回瀾豐利場日敦風

東陳鎮日培英丁堰日興賢白蒲鎮日新民八里莊日清

源謝家店日樂賢芹湖日春陽石莊日時雨西場日時雍

立發日明善 日存性

萬歷十五年知縣劉貞一改設七所一在中禪寺右一在

如臯縣志 卷九 學校

王公祠左一在西門外一在丁堰鎮一在白蒲鎮一在馬

塘場一在掘港場

四十五年守備趙千駟設掘港場社學一所邑人章純仁

易其名日清溪書屋設規約條目十二日立志日虛心日

端品行日開眼界日務實學日去浮靡日毋勦襲日勿作

輟日親正人日惜寸陰日損嗜欲日求義理以上諸社廢

者過半惟三鹽場尚存

義學在雉水書院隔垣

國朝乾隆十二年知縣鄭見龍建

知縣鄭見龍記古者七歲入小學十五入大學義學之

制即小學也萃處童子於其中授之句讀教之灑掃廡

對進退其理不必精其事不必大其功不必煩由末至本於以育德易曰蒙以養正聖功也成人有德豈不以小子有造哉臯之義學舊附崇正書院趙永齋先生卽并崇正入雉水書院後欲改育嬰堂爲義學未幾調去余踵而成之大門兩翼屋五楹養正堂五楹左右廊悉具又後室三楹庖湏五楹

二十九年知縣崔正音重修知縣宋學灝接修邑人汪爲霖捐銀一百兩徐觀光觀政捐銀一百兩黃大音大鶴大鵬捐銀一百兩石鉉銳鎬鉅捐銀一百兩仲之琮之璜捐銀五十兩仲元鰲元龍捐銀五十兩鄭景誠同姪以簡捐銀四十兩康六書捐銀四十兩朱昂朱櫪捐銀四十兩鄭如臯縣志

卷九

學校

畜

國瑞同姪鄭韶鄭晚捐銀四十兩崔林崔有翼有典有孚捐銀四十兩胡之本捐銀三十兩徐錦捐銀三十兩董其事者朱昂胡之本石鎬黃大鶴沈爲轍等知縣崔正音記書院與學校相表裏學校以育才而書院以講學道相需爲理矣方今

聖治

光華郡邑皆修書院臯故人材之藪邑紳捐建雉水書院率諸生肄業其中歷三十年余承乏斯土簿書之暇閱諸生所爲文煇煇炳炳蔚爲偉觀而知書院之大有造於多士也乃其棟宇日就傾圯擬以修葺爲任與士大夫常議及之僉稱善維時學宮亦久闕修庀材鳩工兼營不易不得不權乎輕重以爲後先故少遲之今修葺

事竣復爲之勸士大夫踴躍前議皆克繼先人志事捐  
貲爲同人倡而董以觀其成余惟臯之士大夫雅能趨  
赴公事振興文教爲桑梓光顧以學宮繁費後卽踵是  
役意或難之不圖經始秋仲落成冬孟七旬而功俱舉  
美輪美奐易舊徹新何成功之速歟非好義而力均不  
及此書院之西嚮有義學傾圯久矣茲亦並加修整予  
喜諸生絃誦於斯者獲有寧居以樂羣敬業又幸久於  
茲土獲觀公事之次第有成而尺寸以贊文治也於是  
乎書

嘉慶十年署知縣姚鳳楷重建義學紳士朱大剛范家駒  
張灝顧金壽紀朝幹石蘊岐等董理其事

如臯縣志

卷九

學校

奎

掘港場義學

乾隆十二年掘港場里人程公能等創建於文榮巷吳廷  
璧等續修

赤岸社學在縣治北李家堡嘉慶二十一年鎮人童灝捐  
錢一千二百貫周佩華捐錢二百貫彭壽捐錢二百貫買  
屋五十餘間田四十九畝五分秦文士秦文達捐送周圩  
溝田二十五畝於二十二年春請檣舉行董事者熊純道  
叢之錡康政唐兆鳳唐兆鸞仲振業仲振威彭高繆元光  
周德昌厥後童灝冢媳彭氏次子根俱捐貲勸事克承先志焉  
知縣賀崇禧記建學以儲材也而創之之始爲最難何  
者儲材天下之公義當其圖始則非其子孫身家之計

耳目便安之適必將不勝其畏蕙瞻顧之思况又並出其身家耳目之所利者以爲之乎記曰家有塾黨有庠州有序國有學今天下郡邑莫不有書院之設義學之制然大都非

朝廷之給帑卽衆力之共舉所以鄉曲村市之間社學又寥寥焉蓋家塾黨庠之義不明而人材之不能廣育也久矣去年冬予權知如臯縣事巡政黃君學谷來言其所隸之赤岸有周生佩華彭生壽者於其地建社學方成而請爲記詢其顛末則爲言是舉實始於佩華之父珊性壽之父希堯其能不吝已財而獨力任之者爲監生童顛三人者舊爲婚姻故能襄力以迄於成云學在

如臯縣志

卷九

學校

亥

鎮門臨大河有房五十餘間中設進修堂爲生徒講業所堂之後爲培桂樓奉奎宿其東爲雙願堂董其事者議公地也餘皆諸生誦讀寢興處又東偏有園爲假山其中引水環之構亭曰會心雜植嘉花異木以供遊息又有田五十餘畝歲出租以爲束修膏火修葺之費噫何其詳且備也臯地處海濱於江南爲下邑赤岸又臯邑村鎮之一耳而數人者乃獨念其地距城稍遠不能以時詣書院聽講貧無力者或不能延師則人材之中棄爲可惜所以父子相繼捐貲協力以卒底厥成蓋義氣本乎天性而好學及乎鄉人以視世之家有餘貲非爲子孫計長久卽侈園亭之勝縱耳目之適者其所見

之大小爲何如也黃君又言二生將於其旁別建育之  
施榘之局果爾則其仁心爲質由儲材之義以推廣之  
者且未有既也是皆可記已

周佩華自記畧夫有必爲之志者無不成之事遲速廣  
狹何論焉如吾鄉之設社學亦止延黨庠術序之舊迺  
必遲之又久而後成其遲之又久而卒底於成非成之  
者力也有志乎其先者矣華自早歲侍先府君膝下見  
與外舅童公怡中談論鍾山紫陽各書院事宜津津不  
絕口卽臯城雒水書院及義塾士林咸沐其休惜吾鄉  
僻處海濱艱於就學而寒儉子弟延師又苦力綿雖有  
可造之資多沈錮其耳目聰明於此而欲長善類作士

如臯縣志

卷九

學校

七

氣非於里中建一社學不爲功其時彭希堯先生有同  
志先生亦吾外舅朱陳戚也未幾棄世己巳歲先府君  
又見背希堯先生子澹菴與予爲莫逆交吾外舅因以  
社學勗之曰爾兩人克成吾志亦以繼爾先君子志也  
丙子秋余赴省試外舅病革彌留中秋後已絕粒矣復  
強進粥糜數勺冀稍延以待華歸及進謁卽呼同澹菴  
至榻前授錢一千二百貫諄屬社學之事越一日遂逝  
嗟乎老成繼殞夙願未酬倘更遷延歲月於心安乎於  
是引爲已責竭蹶不遑各捐資以勸厥成并邀同人相  
董理買仲姓舊宅一所門臨大河河水清漣頗饒文秀  
雙橋相夾儼有彩虹明鏡之觀門內額以赤岸社學赤

岸吾鄉舊名也兩翼屋十楹講堂四楹顏曰進修堂取君子進德修業之義也川堂三楹左右廊各二楹重屋五楹上祀七魁顏曰培桂樓以培養人材爲義而道書云文昌主桂籍士之多積善者乃克登之則桂之必賴乎栽培而毋容自撥其本根又一義也講堂東偏屋三楹顏曰雙願堂謂願天常生好人願人常行好事也同人有公議舉集於此此外庖湍悉具樓後羣屋十餘楹分置育嬰施樽所次第布之未竣也東隅荒園數畝舊有小池古樹構亭其間顏曰會心築假山架小橋種名花植美竹蓊然嫣然與牆外沿河樹木相掩映學者退息悠游如登濠梁會心不遠蓋至此而社學之規模粗

如臯縣志

卷九

學校

亥

定矣獨是華之願不止此也竊怪臯邑豈乏瑰偉之材乃自乾隆乙未後無有成進士者四十四年豈文運不振所致歟抑講求之未得所宗歟嘗論科舉外也學古人之學內也必欲養其內以致其外由乎今以進乎古則須延東南知名之士考德問藝一汰吾鄉積習俾不至冥然而趨庶文教駸駸乎其日上耳無如田產無多經費不足欲擴而大之姑俟諸異日此所以抱憾於藏事之太遲而立制之猶狹歟尙憶老泉云功之成不成於成之日必有所自起前人數十年之苦心至今日而始基甫具惟在弦誦其中者文藝一歸雅正德行崇尙中和彬彬乎人文蔚起風俗大淳庶不負先人創建之



志而華與澹菴之所厚望也夫


如臯縣志

卷九

學校

九

書院義學圖



如臯縣志

卷九

學校

七

如臯縣志卷九終

如臯縣志

卷九

學校

三



